

Headlines

- 1 पुंछ च इक स्कूलै दे हेडमास्टर दे कब्जे थमां पिस्तौल ते ग्रेनेड बरामद कीता गेआ, राजौरी च आतंकवादिएं दे इक ठकाने गी तबाह कीता गेआ ते उत्थुआं हथियार असला बरामद कीता गेआ।
- 2 आम चुनावें दे बकाया पेदे मरहलें लेई चुनावें प्रचार तेजिया कन्नै चला'रदा ऐ। सियासी लीडर रैलियां, रोड शो करियै मतदाताएं गी अपनी भेठा करने दी हर मुमकन कोशशां करा'रदे ना।
- 3 नामांकन पत्रें दी जांच मगरा अनंतनाग-राजौरी पार्लिमानी हल्के च हून 21 मेदवार चुनावें मैदान च रेई गे'ना। कल नामांकन परताने दी अखीरी तरीक ऐ।
- 4 प्रधानमंत्री नरेंद्र मोदी होरें आखेआ देश विश्वास करदा ऐ जे चुनावें मगरा भविक्ख आली बत्ता इक नमां सफर शुरू होने आला ऐ।
- 5 सेहत मंत्रालय नै राज्यें ते संघ शासित प्रदेशें गी आखेआ ऐ जे अवैध तरीके नै अंग प्रत्यारोपण च लग्गे दे अस्पतालें खलाफ सख्त कार्रवाई कीती जा।

<><><><><><>

OGW-Poonch

इक्क बड्डी सफलता हासल करदे होई सुरक्षा बलें अज्ज इक्क स्कूल हैड मास्टर, जेड़ा जे पुंछ जिले च आतंकियें लेई ओवर ग्राउंड वर्कर दे तौरा पर कम्म करा रदा हा, गी गिरफ्तार करी लैता ऐ। अधिकारियें गलाया जे सेना ते पुलस सने सुरक्षाबलें हरि बुद्ध इलाके च इक्क अभियान चलाया ते कमरूद्दीन नां दे इस स्कूल हैडमास्टर दे घर थमां पाकिस्तान च बनी दी पिस्तौल ते चीनी ग्रेनेड कन्नै उसी गिरफ्तार करी लैता। उतें दस्सेया जे बरामद कीता गेदा गोला-बरूद ते हथियारें दा इस्तेमाल पुंछ जिले च चला रदे चुनावें च गडबड्डी पैदा करने लेई कीता जाना हा। पुलस नै इस मामले च केस दर्ज करी अगेत्री कार्रवाई शुरू करी दिती ऐ। तोआई इक्क दुई घटना च सुरक्षाबलें राजौरी जिले दे थन्नामंडी इलाके च आतंकियें दे इक ठिकाने गी तबाह करी बड्डी मात्रा च असला बरूद बरामद कीता ऐ। सूत्रें दस्सेआ ऐ जे पुलस ते सुरक्षाबलें दे सांझे तलाशी अभियान च अजमताबाद इलाके शां आतंकियें दे ठिकाने थमां 1 किलोग्राम आई.ई.डी, 2 वायरलेस सेट, ए.के 47 दियां 3 रौंदां, 1 बरूद दी थैली, ए.के 47 दे 102 रौंद ते इक्क चार्जर बरामद कीता ऐ। जम्मू डिविजन दे पुंछ ते राजौरी जिले च ते कश्मीर डिविजन दे अनंतनाग-कुलगाम जिले च 7 मई गी वोट पाए जाने ना।

<><><><><><>

Campaigning

जंदे शुक्रवारें पैहले गेड़ दे चुनावें मुकम्मल होने मगरा आम चुनावें दे बकाया पेदे चुनावें लेई चुनावें प्रचार होर तेज होई गेआ ऐ। जम्मू कश्मीर दी जम्मू सीट ते अनंतनाग-राजौरी आले पार्लिमानी हल्के च बिल तरतीब 26 अप्रैल ते 7 मई गी दुए ते त्रिये गेड़ तैहत वोट पोआए जांगन। दुए गेड़ दे चुनावें प्रचार लेई हुन शडे 4 दिन गै बकाया रेही गे न ते सियासी लीडर जोरें-शोरें नै अपने मेदवार दे हक्के च लोके दा समर्थन कठेरने च कोई कसर बाकी नेई छोड़ा'रदे ना। जम्मू च 22एं मेदवारें चा बीजेपी दे मेदवार ते संसद सदस्य जुगल किशोर शर्मा जेहडे त्री अवधि लेई चुनावें मैदान च न ते साबका मंत्री ते कांग्रेस पार्टी दे कार्यकारी अध्यक्ष रमण भल्ला हुंदे बश्कार कडी टक्कर ऐ। अनंतनाग च 21एं मेदवारें चा साबका मुखमंत्री ते पीडीपी अध्यक्ष महबूबा मुफ्ती ते नैशनल कांफ्रेंस दे मेदवार मियां अल्ताफ हुंदे मझाटै सिद्दा टाकरा ऐ। इआं बीजेपी नै राजौरी-अनंतनाग पार्लिमानी हल्के पर अपना कोई मेदवार नेई खडेरैआ ऐ। सब्बने सियासी पार्टियें दे स्टार प्रचारक INDI गठबंधन ते एनडीए मुख भरै च मतदाताएं गी अपने पाससै करने लेई रैलियां करा'रदे ना।

<><><><><><>

Nomination

अनंतनाग-राजौरी पार्लिमानी हल्के आस्तै मेदवारें दे नामांकन पत्रें दी जांच मगरा हून 21 मेदवार गै चुनांs मैदान च रेई गे'ना जांच दरान 4 मेदवारें दे नामांकन पत्र चुनांs आयोग दे दिशा-निर्देशें मताबक अधूरे पाए गे। इस करी उंदा नामांकन नामंजूर करी दित्ता गेआ। एह्दे मगरा चुनां मैदान च कुल 21 मेदवार रेही गे न। मेदवार अपना नामांकन 22 अप्रैल दपैही 3 बजे तोड़ी परताई सकदे न। 21एं मेदवारें च साबका मुखमंत्री ते पीडीपी प्रधान महबूबा मुफ्ती, साबका मंत्री ते नैशन कांफ्रेंस मेदवार मियां अल्ताफ, साबका पार्शद जफर इकबाल मन्हास जेह्डे के अपनी पार्टी दी तरफा मैदान च न।

<><><><><><>

EVM-Dispatch

सख्त सुरक्षा प्रबंधें तैहत डोडा जिले दे सब्बनें त्रऊं चुनां हल्के थमां इलेक्ट्रिक वोटिंग मशीनां डोडा थमां कठुआ लेई भेजी दित्तियां गेइयां न। बक्ख-बक्ख सियासी पार्टिंएं कारकूनें दी मौजूदगी च ई.वी.एम बक्सें च पाइयै कठुआ लेई लोड कीते गे। एह् बक्से कठुआ च बनाए गेदे स्ट्रांस रूम च रक्खे जाडन जित्थे 4 जून गी वोटें दी गिनतरी कीती जाग।

<><><><><><>

Door-to-Door

सांबा जिले च जेह्डा जम्मू-रियासी लोकसभ सीटै तैहत औंदा ऐ बर्जुग ते दिव्यांग मतदाताएं लेई उंदे घर जाइयै उंदा वोट पोआने लेई सब्बै तैआरियां चला'रदियां न। एह्दे लेई 21 ते 22 अप्रैल दो दिन तैहू कीते गेदे न। लोक भारती चुनां आयोग दी इस पैहलकदमी कन्नै बडे खुश न। मती जानकारी कन्नै सांबा जिले दे साढे संवाददाता सतपाल शर्मा.....बाईट

<><><><><><>

NTA

नेशनल टेस्टिंग एजेंसी नै जून 2024 गी होने आहले यू.जी.सी नेट स्टेहान लेई पंजीकरण प्रक्रिया शुरू करी दित्ती ऐ। इच्छुक मेदवार इंदी अधिकारिक वेबसाइट उप्परा पूरी जानकारी हासल करी सकदे न। पंजीकृत प्रक्रिया 10 मई तगर चलोग।

<><><><><><>

Pm-Mahaveer

प्रधानमंत्री नरेंद्र मोदी होरें आखेआ ऐ जे भारत हून वैश्विक सतह पर सच्चाई ते अहिंसा आले मंत्र पूरे आत्मविश्वास कन्नै दुनिया तकर पुजा रदा ऐ ते जिसी विश्व भरै च व्याप्त समस्याएं परेशानिं गी खत्म करने दे हीले दे तौर पर दिक्खेआ जा रदा ऐ। भारत दी सांस्कृतिक छवि बी इत्त सरबंध्यै च इक अहं भूमिका निभा रदी ऐ। 2 ज्हार 550में भगवान महावीर निर्वाण महोत्सव गी संबोधित करदे होई मोदी होरें आखेआ जे उंदी सरकार नै जिसलै 2014 बरे च सत्ता च आई ही तां उन्नै विरासत दे बाद्दे विकास पर बड़ा मता जोर पाया हा। लोकसभा चुनाएं बारै गल्ल करदे होई उनें आखेआ जे लोकतंत्र दा इक बड्डा उत्सव चला रदा ऐ ते देसै गी विश्वास ऐ जे अगें हून इक नमां भविक्ख शुरू होग। उनें आखेआ जे उंदी सरकार नै योग आयुर्वेद गी बड़ा मता बढावा दित्ता ते नमीं पीढी अपनी पंछान च आत्मसम्मान दी भावना रखदी ऐ।

<><><><><><>

Congress-Voting

जम्मू-कश्मीर कांग्रेस नै उधमपुर पार्लिमानी हल्के दे मतदाताएं गी खराब मौसम ते बरखा दे बावजूद पूरे जोष ते जज्बे कन्नै चुनाएं च हिस्सा लैने लेई मुबारकबाद दित्ती ऐ। अज्ज इक प्रेस कांफ्रेंस गी संबोधित करदे होई जम्मू-कश्मीर कांग्रेस अध्यक्ष विकार रसूल वानी होरें आखेआ जे लोक बीजेपी कशा परेशान होई गेदे न ते हून बदलाव चाहंदे न जेडा के पैहले गेड च होए दे भारी मतदान थमां बांदै होई जंदा ऐ। उनें विश्वास प्रगट कीता जे कांग्रेस पार्टी उधमपुर ते जम्मू-रियासी पार्लिमानी हल्के च पक्क गै जित्त हासिल करोग। उनें आखेआ जे उंदे गठबंधन दी भ्याल पार्टी नेशनल कांफ्रेंस कश्मीर घाटी दिं त्रऊं लोकसभा सीटें पर जित्त हासल करोग। उनें जम्मू, सांबा ते रियासी दे मतदाताएं गी अपील कीती जे ओह अपना कीमती वोट कांग्रेस पार्टी दे हक्कै च पान।

<><><><><><>

Health-Organ

केंद्री सेहत मंत्रालय नै सब्बनें राज्यें ते केंद्र शासित प्रदेशें गी गला ऐ जे ओहू हर उस अस्पतालै दे खिलाफ सख्त ते कनून तैहत कार्रवाई करै, जेड़े गैर कनूनी तरीके कन्नै बिमार इंसान दे अंग कुसा मरीज गी लांदे ना। सब्बनें राज्यें ते केंद्र शासित प्रदेशें गी भेजे गेदे पत्र च भारत सरकार दे स्वास्थ्य सेवाएं दे महानिदेशक डॉ. अतुल गोयल होरें इस गल्ला गी यकीनी बनाने दे निर्देश जारी कीते। न जे सब्बनें अस्पतालें दा आर्गन ट्रांसप्लांट सरबंधी केसें दी पूरी जानकारी हर म्हीने हासल कीती जा। मंत्रालय दा एहू निर्देश हाल च गै हरियाणा ते राजस्थान च बंगलादेशी नागरिकें आस्सेआ चलाए जा रदे अंग तस्करी दे रैकेट दे भांडा फोडने दी घटना मगरा लैता गेआ ऐ।

<><><><><><>

Micro-Observers Poonch

लोकसभा चुनावें दे महेनजर जिला चुनावें प्रशासन पुंछ नै लघु निगराने लेई इक सिखलाई प्रोग्राम दा आयोजन कीता। एहदा उद्देश्य लघु निगराने गी चुनावें प्रक्रिया कन्नै जुडी दी हर लोडचदी जानकारी बारै जानकार करना हा। सिखलाई प्रोग्राम दा सरिस्ता सुरनकोट, पुंछ ते मेंढर चुनावी हल्के च कीता गेदा हा। एहदे बारै गल्ल करदे होई ट्रेनिंग कोआर्डिनेटर हरून राथ होरें स्हाड़े संवाददाता गी दस्सेया।

<><><><><><>

World Heritage

राजौरी दे खेरी इलाके च सेना नै विश्व विरासत दिवस दे बारै च लोकें ते गोवर्नमेंट हायर सेकेंडरी स्कूल दे विद्यार्थियें गी जानकार करने लेई संवाद दा सरिता कीता। इस दौरान एहू शिक्षा दित्ती गेई जे अस कियां अपनी सांस्कृतिक विरासत दी सांभ सम्भाल करी सकने आं तां जे औने आहली पीढी एहदे कन्नै जुडी दी रेई सकै। स्कूल दे शिक्षकें ते मुकामी लोकें सेना दे इस आयोजन लेई आभार प्रगट कीता।

<><><><><><>

US-Tik-Tok

अमरीकी संसद दे निचले सदन च इक्क विधेयक पास करी दित्ता गेआऐ, जेदे तैहत चीन दे लोकप्रिय मीडिया प्लेटफार्म टिकटाक गी इक्क बरे दे अंदर अपनी हिस्सेदारी नेई बचाने उप्पर प्रतिबंधित करी दित्ता जाग। डेमोक्रेट ते रिपब्लिकन दवै पक्षें दे सांसद, राष्ट्रीय सुरक्षा गी लेइयै टिकटाक दे प्रति चैंता बुज्जदे रेय ना।

<><><><><><>